

I PARTÎTS TALIANI E LA PRESUMUDE DEMOCRAZIE

Ancje il spettacul interessant dal tire e mole che al presente il lavôr di De Gasperi a Rome in chescj dîs, al ven a confermânus - se indi vessin bisugne - il fal e il faliment di dut l'implant politic talian, costruît sui partîts.

Al è dibant: chê no po jessi la nestre strade. A cheste ore a varessin di vêlu capît ancje i vuarps. A vuelin temperaments flematics, ecuibrâts, bogns di resonâ cul cjâf e no cui talons, come che a son chei dal Nord, par tignî sù une barache poiade su chei fondaments.

Bisugne vê la scletece e il spirt di ricognossi che il guviêr des direzions dai partîts al è juste il contrari di chê democrazie che si va strombonant. Un ministri talian al è un delegât di une direzion di partît (no un component intai afârs che al à di tratâ); la direzion e je delegade dai deputâts dal partît, i aderents a rapresentin l'interès des massis... Joi ce cjadene di delegaments! Ma in realtât al è il "leader" che si cjate fûr une direzion secont i siei intindiments, e la direzion e propon i deputâts, e i deputâts a dan i ordins ai aderents... E cussì lâts e tornâts, il guviêr al è il risultât des barufis di trê o cuatri caporions, ancje lôr magari direzûts di fûr vie, che a fasin a bracis par tirâ il paîs ce di une bande ce di chê altre slambrantlu e sbregantlu cun dutis lis fuarcis. E chel che nol guverne ni pôc e ni trop al è il popul, come simpri. Il popul al sta a cjalâ, come simpri; al si scjalde a dâ reson o tuart a chest o a chel, secont i gjornâi che al lei, come simpri; o che al si contente di cjoli pal cûl ducj, come simpri, e di disubidî a ducj, plui che al po come simpri. Chê di cjoli pal cûl e di disubidî e je la uniche democrazie taliane. E je la prove plui lampant dal fal fundamentâl di une democrazie.

Dut chest nus interessarès pocut, a dî la veretât, se no pensassin al doman dal nestri Friûl, che par vie dal "cuadri de unitât taliane" al varà di puartâ lis consequencis di cheste situazion. Par chel nus interesse, o pensin unichementri cemût che si podarà aprofitâ di chel tant di autonomie che o podarìn otignî, par gjavâsi fûr plui che si podarà di chel tiremole che o stin discorint.

O savìn ce seguit che a àn i partîts tal Friûl - che ringraziant Idiu, nol è la Romagne -; o savìn che il grant partît de plui part dai furlans al è chel dal taulîr; ma o savìn ancje che lis direzions di ogni colôr a fasaran di dut par strissinâ il guvier regjonâl tal agâr cence jessude, dulà che a àn impresonât tant ben chel centrâl. E se a rivaran adobe di fâ cussì, a podaran tignîsi in bon di vê mandade in fum la nestre autonomie plui ben di ducj i unitaris di vuê. Chest, e nissun altri, al è il pericul che nus fâs pôre pardabon.

pre Bepo - Patrie dal Friûl / 1947